

SARS BEHAAL HISTORIESE R2 TRILJOEN MYLPAAL IN NETTO INKOMSTE- INVORDERING IN ONS DEMOKRASIE

Tshwane, 1 April 2026 - Die Suid-Afrikaanse Inkomstediens (SARS) het R2, 010 triljoen ingevorder en dus die teiken van R2 triljoen in netto inkomste-invordering vir die 2025/26 finansiële jaar oorskry, wat 'n historiese mylpaal oor drie dekades verteenwoordig. Inkomste-invorderings het die afgelope sewe jaar teen 'n saamgestelde jaarlikse groeikoers van **5.8% gegroei, met 'n belasting-tot-BBP-verhouding van 25.9%** en **belastingveerkragtigheidsverhouding van 1.70**. Van die **R25.1 triljoen wat sedert 1997 ingevorder is, is R11.5 triljoen die afgelope sewe jaar ingevorder**. Dit is behaal ongeag die skrikwekkende uitdagings van die verwoestende Covid-19-pandemie, beurtkrag en 'n trae ekonomie.

Die verbeterde inkomste-invorderinguitslag is R24.7 miljard hoër as wat 'n jaar gelede in die minister se 2025-begroting beraam is. Hierdie prestasie weerspieël die gefokusde en noukeurige werk van SARS in hul nakomingsinisiatiewe, verbeterde administratiewe doeltreffendhede, en 'n marginale bydrae deur die mynbosektor. Die inkomste-invordering het die minister van finansies in staat gestel om die nasie die bykomende BTW-verhoging wat hy oorspronklik aangekondig het, te laat vryspring.

SARS Kommissaris Edward Kieswetter het benadruk dat "om meer as R2 triljoen te kon invorder is nie per toeval nie, maar die resultaat van meer as 14 500 werknemers wat ywerig miljoene take noukeurig uitvoer om hierdie rekord-invordering te kon behaal. Elke rand help nie net om 'n bekwame staat te bou wat die sosiale kontrak eer nie, maar stel die staat ook in staat om vir alle Suid-Afrikaners te lewer en die fiskale integriteit van Suid-Afrika te versterk."

Teen 31 Maart 2026 het SARS netto **inkomste van R2 010.3 miljard** oor die afgelope finansiële jaar ingevorder, wat 'n **groei van 8.4%** teenoor die vorige finansiële jaar verteenwoordig en die **nominale BBP-groei van 5.4%** oortref.

Toe die hersiene inkomsteraming vir die 2025/26 finansiële jaar vasgestel is, het dit 'n jaar-op-jaar-groeikoers van **R151.7 miljard (8.2%)** vereis. SARS bly dissipline en konsekwentheid in uitvoering toon. Dit het gelei tot inkomste-maksimering, verbeterde vrywillige nakoming en die fasilitering van wettige handel. Hierdie syfer toon die volgehoue veerkragtigheid van SARS se inkomsteprestasie oor onlangse jare. Dit spreek positief vir ons fiskale gesondheid.

Hierdie resultate is behaal ten spyte van die uitdagings van 'n trae ekonomie, geopolitieke spanning, ontwrigtings in die globale voorsieningsketting en die toename van die onwettige ekonomie.

Teen die einde van Maart 2026 het verskeie belangrike belastingsoorte surplusse aangeteken wat die algehele inkomsteprestasie versterk het:

- **Binnelandse BTW-invorderings het R604.0 miljard bereik, 'n toename van 7.6% jaar-op-jaar**. Van hierdie bedrag is **R291.4 miljard (48.2%)** deur

grootsake-ondernemers betaal, terwyl **R312.6 miljard (51.8%)** deur kleiner ondernemers bygedra is, hoofsaaklik binne die finansiële sektor. Aannames vir binnelandse BTW-groei was **5.3% met die 2025-begroting, 6.8% met die MTBBR, en 7.0% met die 2026-begroting**, met werklike prestasie wat vroeëre verwagtinge oortref het. Groei is ondersteun deur verbeterde verbruikerssentiment, laer rentekoerse wat leenvoorwaardes verlig het, beheerde inflasie, en onttrekkings ingevolge die tweepot-aftreestelsel. Daarbenewens is **R37 miljard** in kontant ingevorder deur geteikende SARS-nakomingsingrypings. Die **BTW vrywillige nakomingsindeks** het merkbaar verbeter, van **66.59% tot 67.19%**, wat sterker jaar-tot-jaar nakomingsgedrag aandui.

- Voorlopige belastinginvorderings vir maatskappye inkomstebelasting (MIB) het **R355.5 miljard** beloop, wat **9.9% jaar-op-jaar groei** gelewer het, maar **R1.3 miljard** onder die hersiene beraming was. Groei was wyd verspreid, met groot maatskappye wat met **7.5% (R16.1 miljard)** uitgebrei het, terwyl KMO's sterker groei van **14.7% (R16.0 miljard)** aangeteken het. Die aanname vir netto MIB (sonder rente) was **6.3% met die 2025-begroting, 7.7% met die MTBBR en 8.7% met die 2026-begroting**.

Hierdie surplusse is gedeeltelik geneutraliseer deur tekorte in sleutelbelastingsoorte, wat ongelyke ekonomiese toestande en spesifieke sektordruk weerspieël:

- Invoere het in 2025/26 effens gestyg met 0.1%. Invoer-BTW het gevolglik met R5.6 miljard (2.2%) gestyg maar onder beramings gebly, terwyl invoerheffings met R5.1 miljard (6.6%) gegroei het en beramings met R1.2 miljard (1.5%) oortref het. Groei is hoofsaaklik deur passasiersvoertuie gedryf. Hierdie tendense dui op markherstel, moontlik ondersteun deur 'n meer akkommoderende monetêre beleid en verbeterde verbruikerssentiment.
- LBS-invorderings het **R767.0 miljard** beloop, met groei van **R59.9 miljard (8.5%)** teenoor die vorige jaar, en het die hersiene beramings met **R4.0 miljard (0.5%)** oortref. LBS het voordeel getrek uit matige nominale loonstygings gekombineer met fiskale sleuring (weens die nie-aanpassing van PIB-skaalgrense en kortings) ten spyte van lae indiensnemingsgroei. Daarbenewens het inkomste voortgespruit uit tweepot-LBS-invorderings ter waarde van **R11.0 miljard**, effens laer as verlede jaar se **R11.9 miljard**.
- **BTW-terugbetalings** ter waarde van **R371.1 miljard** is uitbetaal, wat 'n jaar-op-jaar groei van **R5.6 miljard (1.5%)** weerspieël. Groei-aannames vir BTW-terugbetalings is afwaarts hersien van **5.4% met die 2025-begroting tot 1.6% met die 2026-begroting**. Die grootste terugbetalings is aan die mynbou-, finansiële en vervaardigingsektore gemaak, hoofsaaklik gedryf deur uitvoeraktiwiteit en stygende plaaslike insetkoste. Voorlopige ontleding dui daarop dat SARS na raming **R75.0 miljard** se lekkasie voorkom het deur gefokusde ondersoeke na gesindikeerde misdaad, ouditondersoeke en verifikasieprosesse.

Ten spyte van hierdie pogings bly 'n beduidende bedreiging vir optimale inkomste-invordering bestaan. Die onwettige ekonomie bly die land se hulpbronne uitput, mededinging verdraai en openbare vertroue in die belastingstelsel ondermyn. Aktiwiteite soos smokkelary, doeane- en aksynsbedrog, onderverklaring, vervalste handel, brandstof- en tabaksindikate, en georganiseerde belastingmisdaad lei hulpbronne weg van noodsaaklike openbare dienste en benadeel nakomende belastingpligtiges en wettige ondernemings. SARS skat dat die fiskus weens die onwettige ekonomie jaarliks meer as R100 miljard aan inkomste verloor.

“Mense wat onwettige goedere koop, glo dikwels hulle kry 'n winskoop,” het die Kommissaris gesê. “In werklikheid finansier hulle die vernietiging van wettige ondernemings en werksgeleenthede, verklein die land se belastingbasis en verswak die instellings wat veronderstel is om hulle te dien.” Die kommissaris het beklemtoon dat elke onwettige transaksie die fiskus ontnem van inkomste wat nodig is vir skole, hospitale en openbare infrastruktuur. “Daar bestaan nie iets soos 'n goedkoop transaksie in die onwettige ekonomie nie en die werklike koste word deur die samelewing as geheel gedra. Ons sal nie toelaat dat kriminele sindikate die belastingstelsel uithol nie. SARS, in samewerking met ander wetstoepassingsagentskappe, is vasbeslote om onwettige handelsnetwerke te ontwig, te ontmantel en te sluit, en om nie-nakoming moeilik en duur te maak.”

Vrywillige nakoming bly sentraal tot die vestiging van 'n kultuur van fiskale burgerskap, die versterking van SARS en die beskerming van die integriteit van die belasting- en doeanestelsel. Hoewel die meeste belastingpligtiges vrywillig voldoen, bly doelbewuste nie-nakoming en georganiseerde kriminele aktiwiteite voortbestaan en ondermyn dit die integriteit van die belastingstelsel.

Sleutelnakomingsdrywers gedurende die jaar het ingesluit:

- Kontantinvorderings van skuld.
- Voorkoming van ontoelaatbare en bedrieglike terugbetalingseise.
- Vrywillige blootleggings-ingrype om belastingsake te regulariseer.
- Teenwerking van gesindikeerde belasting- en doeane-misdaad, waardasiebedrog en doeanebeslagleggings.
- Toepassing van datakunde en KI om nakomingsrisiko's te identifiseer en te beperk ter beskerming van die fiskus.

Teen die einde van Maart 2026 is 'n voorlopige R316.39 miljard verseker uit identifiseerbare nakomingsaktiwiteite, bestaande uit R164.59 miljard in kontantinvorderings en R151.81 miljard in lekkasiebeskerming. Dit vergelyk met R304.04 miljard wat in die vorige jaar verseker is, wat 'n jaar-op-jaar netto groei van R12.4 miljard (4.1%) opgelewer het. Nakomingsinkomste verteenwoordig 15.7% van netto inkomste-invorderings, teenoor 16.4% in die vorige jaar.

Verbeterde skuldinvorderingsinisiatiewe het nakomingsuitkomste verder versterk. Skuldinvorderings het gedurende 2025/26 R110.9 miljard beloop, terwyl geteikende vrywillige blootleggingsprogram- (VBP-) -nakomingsinisiatiewe 'n breër en meer volhoubare inkomstegrondslag ondersteun het en R6.8 miljard gelewer het.

SARS het die afgelope sewe jaar die Nugent-kommissie wesenlik geïmplementeer en sy hervormings in lyn gebring met die aanbevelings van die Davis-belastingkomitee, deur die gebruik van belastinggaping-ontledings en geteikende ingrypings om hoërisiko-areas te identifiseer en sistemiese swakhede reg te stel.

SARS deel vandag amptelik sy Modernisering 3.0-program met die publiek. Ons voorsien 'n toekoms waar belastingpligtiges en hul verteenwoordigers met 'n unieke digitale identiteit voorsien sal word, wat biometriese en twee-faktorverifikasie sal gebruik om alle interaksies met SARS te beveilig. Dit sal belastingpligtiges bemagtig om 'n omvattende oorsig van al hul rekeninge by SARS te hê, en hul in staat stel om hul status te verander en by te werk en betalings te doen soos nodig. Hierdie proses sal selfstandigheid aanmoedig. Net so sal 'n bemagtigde SARS-beampte toegang tot die stelsel hê en belastingpligtiges se probleme kan bevorder en oplos. Hierdie stelsel sal ondersteun word deur 'n onmiddellike betalingstelsel, gesteun deur die Suid-Afrikaanse Reserwebank, wat geleidelik die hoeveelheid kontant in omloop sal verminder.

Ook sentraal tot Modernisering 3.0 is 'n intelligente saakbestuurstelsel wat roetinetwerk sal outomatiseer, groot data sal gebruik en KI sal toepas om vrywillige nakoming te bevorder. Uiteindelik sal die proses lei tot modernisering van die BTW-stelsel wat outomatiese aanslag van BTW sal moontlik maak, terwyl doeanemodernisering die geen-stop-grenspokonsep sal ondersteun wat die hele regering betrek en samewerking met grensbestuursagentskappe sal versterk.

Modernisering 3.0 bou voort op die indrukwekkende werk van SARS se outo-aanslae, waardeur meer as 6 miljoen belastingpligtiges, indien hul tevrede was met hul outomatiese belastingaanslag van SARS, niks verder hoef te doen het nie. Dit is die manifestering van die ideale wêreld waarin belasting eenvoudig net gebeur.

SARS het sedert hul stigting in 1994, R25.4 triljoen in netto belastinginkomste ingevorder. Inkomste-invorderings het toegeneem van R114 miljard in 1994/95 tot meer as R2 triljoen in 2025/26. SARS bly onlosmaaklik verbind met ons 32-jarige demokrasie. Hierdie verbintenis spreek tot die fundamentele rol wat SARS speel in die uitvoering van sy wetlike mandaat, sowel as sy "hoër doel" om die welstand van Suid-Afrikaners te dien. Die organisasie volhard op sy reis om 'n herverbeelde, slim, moderne SARS te word wat deur almal vertrou en bewonder word, geanker in sy strategiese doel om vrywillige nakoming te bevorder.

Hoewel vordering beduidend was, erken SARS dat verdere winste moontlik is. Voortgesette betrokkenheid met belastingpligtiges en handelaars bly noodsaaklik om

vrywillige nakoming, vertroue en langtermyn-inkomstegroei te handhaaf. SARS pas tegnologie, masjienleer-algoritmes, agentiese KI en gesofistikeerde datakunde toe om belastingpligtiges en handelaars se nakoming en dienservaring te verbeter, waar “die beste diens geen diens is nie” en “belasting net gebeur”, soos gesien deur meer as 6 miljoen belastingpligtiges wat verlede jaar outomaties aangeslaan is.

Kommissaris Kieswetter het oor hierdie prestasies besin terwyl sy termyn tot 'n einde kom. “Terwyl ek aan die einde van sewe jaar van nasionale diens kom, onthou ek die president se uitdaging aan diegene wat omgee oor die toekoms van Suid-Afrika en toekomstige geslagte om vorentoe te tree, 'n gemaklike aftrede agter te laat en hul plek aan die voorpunt van die stryd in te neem waar werklike verandering plaasvind. Dit was 'n oproep tot diens, 'n oproep om die geloofwaardigheid en vermoë van ons beskadigde instellings te herstel, bondig vasgevang in die oproep *Thuma Mina*.”

“Ek wil die president, die minister en alle Suid-Afrikaners bedank dat hulle my die seldsame voorreg gegee het om my nederige bydrae tot die welstand van ons land en sy mense te lewer. Ek is met geweldige trots vervul dat ons, met die hulp van die mense by SARS, ons beste vir die nasie gegee het.”

“Die rekord wat ons vandag behaal het is te danke aan alle nakomende belastingpligtiges. Ek wil hulle bedank vir hul fiskale burgerskap en bydrae om die mees kwesbares in ons samelewing te help,” het die Kommissaris gesê.

“Die 14 500 SARS-werknemers is die ruggraat van ons organisasie, die ware helde en heldinne van die werk wat ons verrig. Ek salueer elkeen van hulle en spreek my opregte dank uit vir hul onbaatsugtige ondersteuning oor die afgelope sewe jaar.”

Vir meer inligting, kontak SARS by SARSMedia@sars.gov.za.

EINDE